

倭人在帶方東南大海之中依山島爲國邑舊百餘國漢時有朝見者今使譯所通三十國從郡至倭循海岸水行歷韓國乍南乍東到其北岸狗邪韓國七千餘里始度一海千餘里至對馬國其大官曰卑狗副曰卑奴母離所居絕島方可四百餘里土地山險多深林道路如禽鹿徑有千餘戶無良田食海物自活乘船南北市糴又南渡一海千餘里名曰瀚海至一大國官亦曰卑狗副曰卑奴母離方可三百里多竹木叢林有三千許家差有田地耕田猶不足食亦南北市糴又渡一海千餘里至末盧國有四千餘戶濱山海居草木茂盛行不見前人好捕魚鱣水無深淺皆沈沒取之東南陸行五百里到伊都國官曰爾支副曰泄謨觚柄渠觚有千餘戶卅有王皆統屬女王國郡使往來常所駐東南至奴國百里官曰兕馬觚副曰卑奴

母離有二萬餘戶東行至不彌國百里官曰多模  
副曰卑奴母離有千餘家南至投馬國水行二十  
日官曰彌彌副曰彌彌那利可五萬餘戶南至邪  
馬壹國女王之所都水行十日陸行一月官有伊  
支馬次曰彌馬升次曰彌馬獲支次曰奴佳鞮可  
七萬餘戶自女王國以北其戶數道里可得略載  
其餘旁國遠絕不可得詳次有斯馬國次有巳百  
支國次有伊邪國次有都支國次有彌奴國次有  
好古都國次有不呼國次有姐姐國次有對蘇國  
次有蘇奴國次有呼邑國次有華奴蘇奴國次有  
鬼國次有爲吾國次有鬼奴國次有邪馬國次有  
躬臣國次有巴利國次有支惟國次有烏奴國次  
有奴國此女王境界所盡其南有狗奴國男子爲  
王其官有狗古智卑狗不屬女王自郡至女王國  
萬二千餘里男子無大小皆黥面文身自古以來  
其使詣中國皆自繻大夫夏后少康之子封於會  
稽斷髮文身以避蛟龍之害今倭水人好沈沒捕  
魚蛤文身亦以厭大魚水禽後稍以爲飾諸國文  
身各異或左或右或大或小尊卑有差計其道里  
當在會稽東治之東其風俗不淫男子皆露紵以

木繇招頭其衣橫幅但結束相連略無縫婦人被髮屈紒作衣如單被穿其中中央貫頭衣之種禾稻紵麻蠶桑緝績出細紵縑繇其地無牛馬虎豹羊鵠兵用矛楯木弓木弓短下長上竹箭或鐵鏃或骨鏃所有無與擔耳朱崖同倭地温暖冬夏食生菜皆徒跣有屋室父母兄弟臥息異處以朱丹塗其身體如中國用粉也食飲用籩豆手食其死有棺無槨封土作冢始死停喪十餘日當時不食肉喪主哭泣他人就歌舞飲酒已葬舉家詣水中澡浴以如練沐其行來渡海詣中國恒使一人不梳

頭不去蟣蝨衣服垢污不食肉不近婦人如喪人名之爲持衰若行者吉善共顧其生口財物若有疾病遭暴害便欲殺之謂其持衰不謹出真珠青玉其山有丹其木有柑杼豫樟檟櫪投櫃烏號楓香其竹篠簌桃支有薑橘椒蘘荷不知以爲滋味有獼猴黑雉其俗舉事行來有所云爲輒灼骨而卜以占吉凶先告所卜其辭如令龜法視火坼占兆其會同坐起父子男女無別人性嗜酒魏略曰其俗不知正耕歲四節但計春見大人所敬但搏手以當跪拜其人壽考或百年或八十年其俗國大人皆四五婦

下戶或二三婦婦人不淫不妬忌不盜竊少諍訟其犯法輕者沒其妻子重者滅其門戶及宗族尊卑各有差序足相臣服收租賦有邸閣國國有市交易有無使大倭監之自女王國以北特置一大率檢察諸國諸國畏憚之常治伊都國於國中有如刺史王遣使詣京都帶方郡諸韓國及郡使倭國皆臨津搜露傳送文書賜遺之物詣女王不得差錯下戶與大人相逢道路逡巡入草傳辭說事或蹲或跪兩手據地爲之恭敬對應聲曰噫比如然諾其國本亦以男子爲王住七八十年倭國亂相攻伐歷年乃共立一女子爲王名曰卑彌呼事鬼道能惑衆年已長大無夫婿有男弟佐治國自爲王以來少有見者以婢千人自侍唯有男子一人給飲食傳辭出入居處宮室樓觀城柵嚴設常有人持兵守衛女王國東渡海千餘里復有國皆倭種又有侏儒國有其南人長三四尺去女王四千餘里又有裸國黑齒國復在其東南船行一年可至參問倭地絕在海中洲嶼之上或絕或連周旋可五千餘里景初二年六月倭女王遣大夫難升米等詣郡求詣天子朝獻太守劉夏遣吏將送

詣京都其年十二月詔書報倭女王曰制詔親魏  
倭王卑彌呼帶方太守劉夏遣使送汝大夫難升  
米次使都市牛利奉汝所獻男生口四人女生口  
六人班布二匹二丈以到汝所在踰遠乃遣使貢  
獻是汝之忠孝我甚哀汝今以汝爲親魏倭王假  
金印紫綬裝封付帶方太守假授汝其綬撫種人  
勉爲孝順汝來使難升米牛利涉遠道路勤勞今  
以難升米爲率善中郎將牛利爲率善校尉假銀  
印青綬引見勞賜遣還今以絳地交龍錦五匹臣

之以爲地應爲緹漢文帝著皐衣謂之弋緹是也此字不體非魏朝之失則傳寫者誤也絳地縹粟罽

十張蒨絳五十匹紺青五十匹蒼汝所獻貢直又  
特賜汝紺地句文錦三匹細班華罽五張白絹五  
十匹金八兩五尺刀二口銅鏡百枚真珠鉛丹各  
五十斤皆裝封付難升米牛利還到錄受悉可以  
示汝國中人使知國家哀汝故鄭重賜汝好物也  
正始元年太守弓遵遣建中校尉梯儁等奉詔書  
印綬詣倭國拜假倭王并齎詔賜金帛錦罽刀鏡  
采物倭王因使上表荅謝詔恩其四年倭王復遣  
使大夫伊聲耆掖邪狗等八人上獻生口倭錦絳  
青縑繇衣帛布丹木狝短弓矢掖邪狗等壹拜率

善中郎將印綬其六年詔賜倭難升米黃幢付郡假授其八年太守王頥到官倭女王卑彌呼與狗奴國男王卑彌弓呼素不和遣倭載斯烏越等詣郡說相攻擊狀遣塞曹掾史張政等因齎詔書黃幢拜假難升米爲檄告喻之卑彌呼以死大作冢徑百餘步徇葬者奴婢百餘人更立男王國中不服更相誅殺當時殺千餘人復立卑彌呼宗女壹與年十三爲王國中遂定政等以檄告喻壹與壹與遣倭大夫率善中郎將掖邪狗等二十人送政等還因詣臺獻上男女生口三十人貢白珠五千

孔青大句珠二枚異丈親錦二十四匹